

17/06/1998

Ilmu IT benteng penjajahan celik IT

Web Sutera

ASSALAMUALAIKUM dan salam sejahtera untuk semua. Bertemu lagi kita di kolum Jalinan Jaring. Bahang Kuala Lumpur 98 semakin membara. Diharap negara kita akan berjaya menjayakan temasya sukan dunia kedua terbesar ini.

Laman web rasmi di <http://www.kualalumpur98.com.my> dapat memberikan maklumat yang anda perlukan mengenai Sukan Komanwel ke-16 di Kuala Lumpur ini. Silalah berkunjung ke laman ini. Apa yang pasti, dengan Internet penyebaran maklumat dapat dimudahkan ke seluruh dunia. Melalui Internet juga negara kita lebih mudah dikenali oleh warga dunia seluruhnya.

Berbalik kepada perbincangan mengenai teknologi maklumat (IT) dan Internet, kita sedia maklum bahawa IT yang merangkumi perkakasan dan perisian komputer berkembang dengan pesat. Dalam kepesatan itulah lahirnya peralatan baru yang telah mempengaruhi hidup kita dan ia akan berterusan begitu. Itulah Internet.

Jika pembaca mengikuti ucapan YAB Perdana Menteri Malaysia, Datuk Seri Dr. Mahathir Mohamad ketika merasmikan Eksposisi Multimedia, Telekomunikasi dan Elektronik Kelantan (Emtek '98) dari 29 Mei hingga 3 Jun yang lalu, tentu anda dapat mengimbas intipati ucapan beliau.

Antara isi ucapan yang menarik perhatian kami ialah mengenai bentuk penjajahan baru melalui IT.

Memang benar, ada pihak di Barat yang berhasrat untuk menjajah negara lain, termasuk Malaysia yang kita cintai. Kali ini bentuk penjajahan bukanlah dengan kekuatan senjata dan bala tentera, tetapi melalui IT dan Internet.

Konsep dunia tanpa sempadan memberikan satu keadaan seolah-olah dunia yang kita duduki ini tidak mempunyai sempadan lagi. Setiap orang bebas keluar masuk tanpa ada kawalan.

Untuk mengelak daripada dijajah, masyarakat Malaysia tanpa mengira agama dan bangsa perlu melengkapkan diri dengan ilmu IT. Ilmu ini yang diselubungi dengan nilai agama yang menjadi pegangan kita umpama senjata ampuh menangkis serangan minda dan maklumat dari pihak Barat.

Dengan rakyat yang berilmu dan bermaruah, kita akan dapat membezakan yang mana unsur baik dan yang mana pula anasir perosak masyarakat.

Justeru itu, untuk menjadi sebuah negara maju yang mampu bersaing dengan negara maju yang lain, Malaysia perlu mengambil langkah untuk berada di hadapan dalam bidang teknologi terkini.

Bagi memastikan wawasan menjadikan Masyarakat Madani terhasil, semua peringkat masyarakat perlu celik IT. Untuk membudayakan IT, ia perlu diperkenalkan kepada rakyat jelata.

Masyarakat yang berada jauh dari bandar besar dan kawasan Koridor Raya Multimedia (MSC) harus diberi peluang untuk melihat sendiri peralatan dan kegiatan yang berkaitan dengan perkembangan IT.

Untuk itu, Jalinan Jaring berharap lebih ramai pihak mengambil langkah dan daya usaha bagi mengadakan sesi penerangan dan kempen kesedaran seperti Kempen Kesedaran IT yang akan terus berlangsung dan Emtek 98 yang telah berlalu. Salam mesra.

Berjasa sungguh usaha petani,  
Membanting tulang membakar diri;  
Budaya ilmu budaya murni,  
Ilmu IT pendinding diri.

Web Sutera

(END)